

VENDIM
Nr.428, datë 11.7.2007

**PËR LEJIMIN E KALIMIT TRANZIT TË DISA TRUPAVE USHTARAKE ITALIANE,
PËRMES TERRITORIT TË REPUBLIKËS SË SHQIPËRISË**

Në mbështetje të nenit 100 të Kushtetutës dhe të neneve 16, pika 2, 17, 18 e 19 të ligjit nr.9363, datë 24.3.2005 “Për mënyrën dhe procedurat e vendosjes dhe kalimit të forcave ushtarake të huaja në territorin e Republikës së Shqipërisë, si dhe për dërgimin e forcave ushtarake shqiptare jashtë vendit”, me propozimin e Ministrit të Mbrojtjes, Këshilli i Ministrave

VENDOSI:

1. Lejimin e kalimit tranzit, përmes territorit të Republikës së Shqipërisë, të 12 (dymbëdhjetë) trupave dhe 6 (gjashtë) mjeteve ushtarake italiane, në itinerarin Qafë-Thanë – Durrës, në datën 6 korrik 2007 dhe lejimin e kalimit tranzit të po këtyre trupave dhe mjeteve në datën 13 korrik 2007, në itinerarin Durrës – Qafë -Thanë.

Për trupat ushtarake, që do të kalojnë në datën 6 korrik 2007, pika e hyrjes në territorin e Republikës së Shqipërisë është pika e kalimit kufitar, në Qafë-Thanë, dhe pika e daljes është pika e kalimit kufitar, në Durrës, ndërsa për trupat, që do të kalojnë më 13 korrik 2007, pika e hyrjes është pika e kalimit kufitar, në Durrës, dhe pika e daljes është pika e kalimit kufitar Qafë-Thanë.

2. Procedurat për hyrjen, qëndrimin dhe daljen e këtyre trupave në/nga Republika e Shqipërisë janë parashikuar në “Marrëveshjen, ndërmjet palëve të Traktatit të Atlantikut të Veriut, për statusin e forcave”, nënshkruar në Londër, më 19 qershor 1951 dhe në “Marrëveshjen, ndërmjet shteteve palë në Traktatin e Atlantikut të Veriut dhe shteteve të tjera, që marrin pjesë në Partneritetin për Paqe, përsa i përket statusit të forcave të tyre”, nënshkruar në Bruksel, më 10 janar 1994, si dhe në protokollin shtesë të “Marrëveshjes, ndërmjet shteteve palë në Traktatin e Atlantikut të Veriut dhe të shteteve të tjera, pjesëmarrëse në Partneritetin për Paqe, përsa i përket statusit të forcave të tyre”, ratifikuar nga Kuvendi i Republikës së Shqipërisë, me ligjin nr.8034, datë 22.11.1995.

3. Gjatë itinerarit të lëvizjes trupat italiane të shoqërohen nga njësi të armatosura të Forcave të Armatosura të Republikës së Shqipërisë.

4. Ngarkohet Ministria e Mbrojtjes për zbatimin e këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Sali Berisha